

55jaor Kènjeroptoch Sle
en 44jaor Slekker Sjnaake
prinsen en prinsessen.



In 1964 hawwe weer op de Slek oze 1e jeugdprins: Ton Heythuisen, de start van ós jeugdprinsenriek.

Het jaor doaop, 1965, woor ein heel biezunjer jaor veur de pejjer gemeinsjap: RIOS en de fanfaar worte allebei landskampioen. Het verenigingsleave bruiste, auch oppe Slek. In det jaor waerdje Maan van Neer vastelaovesprins van de Aester Sjaelen Uul. Dae Prins Maan haw toen same mit Berta Golsteyn van de Antoniusput op vasteloaves daensdig eine kènjeroptocht georganiseerd. Het woor ein lekker ongeorganiseerd ongerein van kènjerwages, bolderkerre en weit ich waat allemaol.

Bie de Slekker bevolking sloog den optoch zo good aan, det ein jaor later de schuterie auch mit ging doon. Oze Kènjeroptoch waerdje steeds bekenjder in 't riek van de Aester Sjaelen Uul, wodoor auch jeugd van de anger kernen van Pej mit ginge doon.

In 1979 volgde de oprichting van de vastelaoves-disco door de voetbalclub en de Antoniusput. En det jaor hawwe weer ein prinselek duo oppe Slek: vader en zoon Feller, baeter gezag Prins Lei 1 en Prins Theo 1. Den optoch trok toen veur 't iëes op de zondig veur vastelaovendj. Sinds dae tied is dit veur veul lui de opwermer veur vastelaovendj en neet meer weg te denken oet de Pejjer vastelaovendj.

De oudste jeugdige vanne Slek: de Senioren hubbe auch 'ne tied mit gedoan aan den optoch. In 1983 deej zich 't volgende veur: bie 't nao boete riejje van hunne Prinsewage koom Prins Piet Hinzen ten val, hae hou get pien aan unne erm, 'maar det goof niks' zag Piet en trok vrolijk mit. Achteraaf ging der toch mer aeve langs den dokter, dae sjikde h'm direk nao 't hospitaal want dae erm woor gebraoke.

Detzelfde jaor kreege wer oppe Slek de ieëste jeugdprinses: Astrid Vonk, het vormde same mit Erik Vergoossen ein jeugdprinsenpaar.

De Kènjeroptoch weurjt auch waal gezeen es opleidingscentrum veur de Pejjer vastelaovendj want Richard Leurs woor in 1984 iëes jeugdprins

en in 1999 prins van den Aester Sjaelen Uul. Det geldj auch veur Peter Knobens, in 1988 jeugdprins en in 2017 groate prins.

In 1988 waerdje Jos 1(Slabbers) grote prins, de vastelaovesslager van det jaor woor "Gaontj mit op de boemeltoer" door Harry Schreurs geschreve. Mit de Antoniusput maakte wer toen eine milieu vriendelijke boemeltrein: weer duujde hem mit os spierballe euver de Slek, maar 50 kènjer in dae trein woor toch erg veul, sommige bestuursleje hubbe 't zweit noe noch op de ruk staon.

In 2007 vónje weer det de Slekker jeugd eine eige naam mos hubbe, en weer vroege de Slekker luuj eine naam te bedenke, dit wordj: de Slekker Sjnaake.

In 2009 hawwe weer get speciaals oppe Slek: het prinsenplein, Prins Frits Krause en jeugdprins Jules Snippe woondje toen vlak biejein aan t pleintje oppe Slekkerstraat.

In 2017 woor het nao 22jaor trouwe deens tied veur nuuj prinsepekskes, en kreeg os prinsenpaar een sjoane bordeaux roaje kleur. En daomit sjittere ze op oze vaste prinsewage van Broer Vergoossen [oud ASU prins].

De Sprenkhane doon auch sinds jaor en daag mit in den optoch, en vanaaf 2019 truktj de jeugdprins van den ASU mit. Sjoale, families, vrunj, einzelgengers en muziekgroepen zeen voltallig aanwezig. En natuurlik truktj den prins van den Aester Sjaelen Uul mit.

Noe in 2020, hubbe weer jubileum, 5x11=55 jaor trekke wer rondj euver de Slek, en nog steeds venje weer det te gek.

Dit doon wer in samenwerking mit 't optochtcomite van de Aester Sjaelen Uul. **Wer haope uch weer allemaol te zeen in den optoch of langs de kantj op 16 fibberwarie.**

De Slekker Sjnaake wènse uch eine sjoane vastelaovendj toe, Sjregkedek!